

# IONAA (Jonah – Jona)

*Ionaava Kotira qaquirakero vonaini vura*

<sup>1</sup> Amitaira maaqu Ionaava vauvaro vo enta Noravano Kotiva vira tiva amiro <sup>2</sup> tiharo, Are himpira nora vatuka Niniveni oruntera vi vatanaaka qora kaiqa vare varia uvvara vika qoqaa tiva nimiane. Te tavauraro vika qora kaiqa vare varia okarava uritarakero vaivo, tiro.

<sup>3</sup> Noravano Kotiva minti tuvaro Ionaava, Te kia mini virerave. Te qaquirake vonaini virerave tivakero, vo vatuka Tasisini vireva auti vaura. Viva Jopaini otuntero Tasisini vuaina *sipira* rantakero, *sipi* vira koqaa aqukero viraqi vaarintero tiharo, Te Nora Kotira qaquirake Tasisini oru vairerave, tura.

<sup>4</sup> Ionaava minti tivakero *sipi* vaarintero vuvvaro viraqaaahairo Noravano Kotiva tuvaro nora uvaivano nora namariqaa uti vauvaro aaron-aavanovata uti vauvaro *sipivano* raqaviro taiqa vuarirava aumaiqura.

<sup>5</sup> Mintumanta *sipi* kaiqa varo vaiintika voqamake qete vaiha vinavuka nái variqa, vo variqa vo variqa naaramaqi vi vaiha, Tinavu kahaqiate, tivaqi viha, *sipivano* vuaqa ntaarire ti, vo *kaako* vo *kaako* viraqihai vara vaavi namariqi aqu aquma kora. Vika vo haika vo haika nora namariqi aquke vauvaro Ionaava *sipi* ataaqi otuntero vaita aavata viro vaura.

**6** Viva vaite vauvaro *keptenivano* viva vaunaini otuntero tiharo, Nantivarae are qaqi vaite variaro? Himpira nena variqavata aarairaro viva tinavu kahaqiarire. Ai variqavano tinavuara mpo ike tiva timiteharo tinavu vehakuma timitairera, kia tenavu qutu vuare, tiro.

**7** Viva minti tumanta *sipi* kaiqa vare vau vaiintinavuka nai ire nai ireha tiha, Ta vaiintira kaarae maa okarava tinavuqaa qovaraiqivo? Kaiqe *satu* arukeha vi vaiintira autu ranta kaare, tivake vika *satu* arukeha tavovaro Ionaara autuvano qovarama vura.

**8** Mintumanta vika tiha, Oho, are tinavu quqaa uva tiva timiraqe iriare. Ai okara kaarae maa okarava tinavuqaa qovaraiqivo? Are nana kaiqa varaaravave? Are taihairae aniaro? Ai maaqa tainie vaivo? Are ta vatanaavave? ti.

**9** Vika minti tuvaro Ionaava vika nái tiva nimiro tiharo, Te Hiparu vataanaakave. Te Noravano Kotiva naaruvaini vai Variqara autu tuaherake vauraukave. Noravano Kotiva nora namarivata vatavata autukero vataivave, tiro.

**10** Ionaava minti tivakero viva Nora Kotira uva qaqrakero vonaini vuare tu uvaravata vika tiva nimumanta iri, vika voqamake aatu itomanta tiha, Oho, are mintiharama qora kaiqama vara kaarao, ti.

**11** Vika minti tivake tavovaro nora namarivano voqavata *sipi* vira venta venta i vaumanta vika Ionaara ireha tiha, Tenavu ai nantia kaariraroe nora namarivano oti vaiqiro tirema kero varianarove? ti.

**12** Vika minti tuvaro Ionaava tiharo, Ne ti utu vare nora namariqi vara vaavi aqu kaivaro

namarivano oti vaiqiro tirema variarire. Te virara kankomake irunarave. Te maini anunara kaarama aaronavano niqi qovaraiqivo, tiro.

<sup>13</sup> Ionaava minti tumanta vika kia vira namariqi aqu kaataa umanta vika tiha, Kaiqe namari rairaqui viha *sipi* vuru varuva auvahini kaare, tivake namari rairaqui viha tavovaro vika kaiqa varova kia ho aruvuvaro nora namarivano *sipi* vira qaqqai anomakero venta venta i vaumanta <sup>14</sup> viraqaahai vika Nora Kotira aareha tiha, Oho, Noravauvo, tenavu aimaa aare vauro. Tenavu maa vaiintira nora namariqi aqu kaarirara are kiama tinavuqaa uva vatehara tinavu haru kaane. Are tianantema keroma, aaronaa maava qovaraiqivo, ti.

<sup>15</sup> Vika minti tivake Ionaara utu vare vara vaavi nora namariqi kovaro vaakama nora namarivano qaki qaki i vauva taiqa viro tirema kero vaura.

<sup>16</sup> Mintumanta *sipi* kaiqa varoka voqamake qete vaiha vika vo *ofaa* Nora Kotira amiteha, nái kauqu aiqiqaa aqukeha tiha, Mpo, tenavu ai kaiqaqai varaqi virerave, tura.

<sup>17</sup> Ho Ionaara namariqi aqu kovaro Noravano Kotiva nora havuka vara kovaro vi havukava Ionaara nampiqama kovaro Ionaava taaramo enta entaqivata aatitoraqavata vira avutaqi vaura.

## 2

### *Ionaava Nora Kotira aarora*

<sup>1</sup> Ionaava havuka auhaqi vahiaro nai Variqa Nora Kotira aarero <sup>2</sup> tiharo,

Noravauvo, te anomake qoraiqamavi vau-ruka ai aaururara are ti uva irira iaro.

Qutu vuaka varianaini te vaiha ai aareha ariara mpo ti kahaqiane turara are ti uva irira ti kahaqira iaro.

<sup>3</sup> Are nora namariqi ti aqu kaaramanta te varuvaqi kupeqavi vauraro nora namarivano ti naavuma kero tiqaa kumpetaqi uriro takui vaharo vi ani vairave.

<sup>4</sup> Mintimanta te tiha, Oho, Kotiva nai avuqaa-hairo ti qaqirama kaivo. Mpo, te Kotira Naavu kia ho qaiqaavata tavaainarave, turo.

<sup>5</sup> Namarivano ti aqu kero raqutu kareva auti vaimanta te vauraro namarivano ti aqu ravaaqqavu kaivaro namariqi vai ukauva ti qitavau ovenaaruma kaimanta vaunarave.

<sup>6</sup> Nora namariqi vai aiqinara vira auvoqi te otinuraro vevaraqi vai vatava ti ekaara ravaaqqavu kareva auti vaimanta vaunarave.

Noravauvo, are ti Variqavano variaramanta te mini vaurara are nora varuvaqihaira ti tivita varaaramanta te kia qutu viraiti, qaqi vaunarave.

<sup>7</sup> Noravauvo, te tiha, Mpo, te qutu vuarirava aumantoma vaivo, tivake viraqaahai te ariara irike ai aaraurara are nena Naavuqihaira ti uva irianarave.

<sup>8</sup> Ike, una variqa autu tuaherake variaka kia are aaqurihamma nimitaana okarara iriarave.

<sup>9</sup> Te kia vika voqaantemake vairaiti, te ihi tivakeha ariara koqeve tivaqi viha, vo *ofaa* vare ai iha quara amitarerave.

Te kauqu ainqaa aqukeha mintirerave tuna uvvara quqaa mintirerave.

Noravauvo, areqaima tinavu ruaruama

timiterava variaro, tiro.

<sup>10</sup> Ionaava minti tivakero Nora Kotira aarovaro Noravano Kotiva tuvaro nora havukavano vuru aahara vataini Ionaara vihi kora.

### 3

#### *Ionaava Niniveni oruntora*

<sup>1</sup> Noravano Kotiva qaiqaa Ionaara tiva amiro

<sup>2</sup> tiharo, Are nora vatuka Niniveni oru vaihara te ai tiva amuna uvara vi vatanaaka tiva nimi-anne, <sup>3</sup> tuvaro Ionaava Noravano Kotiva tunte iro Niniveni vura.

Ninive nai nora vatukavano vauvaro vaiintivano vi vatukara ututuma kero taaramo entara vi anima kaarirava vaura.

<sup>4</sup> Ho Ionaava Ninive vatukaqi oriqetero vohaa enta nuvakero, viraqaahairo viva naveraitiharo, 40 entanavu aitarairaro Kotiva maa vatukara vehi autu taiqa kaanarove, tiro.

<sup>5</sup> Ionaava minti tumanta Niniveqi vau vaiinti nahentika tiha, Ququaama Kotiva mintianarove, tivake vohaa uva tivake tiha, Kaiqenavu tenavu ekaa vaiinti nahenti, nora vaiintivata in-aara vaiintivata kara auramate, nihi utavaaqaqai nonku taariraro Kotiva tenavu qora aara qaqlira kaainara tavaarire, ti.

<sup>6</sup> Manti tuvaro avuhainaa vaiintivano Niniveqi vauva, vivavata vi uvara iriro viva nai avuhainaa taintaqaahairo himpiro nai koqe utavaaqaqai qaqlira varakero nihi utavaaqaqai nonkutero oru iha quarato hantaraqi oquviro vaura. <sup>7</sup> Viva mintima kero vaiharo Niniveqi vau vaiinti nahentikaini uva varakero tiharo,

Te ni avuhainauka tenta nora vaiintinavu vataake ni qioqama teha niara mintima ti:

Ne ekaa kia kara naate. Vaiinti nahentive, purumakauve, sipisipive, tenavu ni qioqama teha kia karavata namarivata naate, turo.

<sup>8</sup> Ne ekaa kovaara utavaaqa nonkuteha, nenta purumakauqaave sipisipiqaave, kovaara tavuna aqu nimiteha Kotira aaramaqi viha qora kaiqa, vo kaiqa vo kaiqa varera qaqrake, nai ruquti nai ruquti okararavata qaqlira kaate.

<sup>9</sup> Tenavu mintiariraro Kotiva tinavuara arara itairava humpairaro viva tinavu vehi autu kareva inara qaqlira kero, tinavu aaqurihamma timitaanarove? tiro.

<sup>10</sup> Avuhainaa vaiintivano minti tumanta ekaa vaiinti nahenti viva tunte uvapro Kotiva tavo manta vika qora aara qaqlira kora. Mintuvaro Kotiva tota tu uvapro qaqrakerovo vika aaqurihamma nimiteharo kia vika vehi autu kora.

## 4

### *Kotiva vaiinti nahenti aaqurihamma nimitora kaara Ionaara arara itora*

<sup>1</sup> Kotiva vaiinti nahenti aaqurihamma nimitora kaara Ionaara arara itovaro <sup>2</sup> viva Kotira aarero tiharo, Noravauvu, te kia maini aniraiti, te tenta maaqaini variavauna entara quqaae te ariara viva mintianarove tiavaunarave? Virara irihama te qaqrake Tasisini ruqemake virera auti variavaunarave. Te kankomake irurara are vaiinti nahenti koqema nimitehara vika aaqurihamma nimiti variara Variqavave. Ai araravano kia vaaka itaivaro ai muntukavano vaiinti nahentiara voqama kero vavara variaravave. Are vo haika kaara vaiinti nahenti vehi autu taiqa

kareva ihara, vo avu aato irikehara kia vika vehi  
autu taiqake varianarave.

<sup>3</sup> Oho, Noravauvo, ti qaqi kairaqe te qutu vuare.  
Koqemama te kia qaqi vairaiti, qutu vuataarave,  
tiro.

<sup>4</sup> Ionaava minti tuvaro Noravano Kotiva aqao  
tiro, Kia virara ai arara itaarire. Ai arara itaarira  
haikava kiama ho vaivo, tiro.

<sup>5</sup> Noravano minti tuvaro Ionaava Ninive  
vatuka mini kero vatuka aaqaini kuariavu  
urinaini oru oquiviro vaura. Viva haraara naavu  
kaqakero viraqi oquiviro vaiharo tiharo, Kaiqe  
vaiha tavaariraro nana haikavane Niniveqi  
qovaraiqianarove? tivakero vauvaro <sup>6</sup> Noravano  
Kotiva kuarivano vira tatoqa kaantorave  
tiro, viva tuvaro vaahi naaqunta voqaava  
qampiqatero Ionaara aqu amitovaro Ionaava  
vaahi virara quaha kero vira aumaqaaraqi  
koqema kero vaura.

<sup>7</sup> Ionaava ho vauvaro vira qararaa Kotiva  
qaiqaa tuvaro toveqivano vaahi vira ne vau-  
varo vaahi viva tamunta vura. <sup>8</sup> Vaahivano  
tamunta vuvvaro kuarivano uruvaro Kotiva kua-  
haara varakovaro uti vauvaro kuarivano no-  
raiqaakero iteharo Ionaara qiata tatoqa kovaro  
vira kaara viva avu rira ura. Mintuvaro viva  
Kotira aareharo tiharo, Ti qaqi kairaqe te qutu  
vuare. Koqemama te kia qaqi vairaiti, qutu  
vuataarave, tiro.

<sup>9</sup> Minti tuvaro Kotiva tiharo, Vaahivano  
tamuntavira kaarae ai arara itaivo? Ai arara  
itaarira haikava kiama vaivo, tiro.

Tuvaro Ionaava tiharo, Ti tirara itaarira haikava vairove. Ti tirara itairara tira, are ti qaqi kairaqe te qutu vuare, tiro.

<sup>10</sup> Ionaava minti tuvaro Noravano Kotiva aqao tiro, Are kia vaahi vira ututera viraqaata raqiki-raitira, are qaqi variararo vaahi viva naivano entaqi qampiqeharo noruqama viro vira qararaa entaqi tamunta vira, vira kaara are mpo ike ti variaro. <sup>11</sup> Are vi haikara, qaqi qumina haikara mpo ike ti variaramantavata, te Ninivera mpo ike ti vauro. Ninive nora vatukavano vaimanta viraqi 120,000 vaiinti nahenti kia koqe okarave qora okarave ho rairake tavaaka variamanta sipisipivata purumakauvata airitahaa variamanta ti, te homa vikara ike mpo tiva nimitararave, tiro.

Noravano Kotiva minti turama.

**Kotira Uva  
The New Testament and portions of the Old  
Testament in the North Tairora Language of Papua  
New Guinea**

**Nupela Testamen na sampela hap Olpela Testamen  
long tokples Tairora long Niugini**

copyright © 1979, 1994, 2005, 2008, 2009, 2012 Wycliffe Bible Translators,  
Inc.

Language: Tairora

Dialect: North Tairora

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-26

---

PDF generated using Haiola and XeLaTeX on 11 Nov 2022 from source files  
dated 30 Nov 2021

909b265f-c886-56ae-b943-fdc12fe46c5e